

摘藻堂四庫全書薈要

集部

欽定四庫全書薈要

集部

誠齋集卷九

十

詳校官助教臣謝登雋



欽定四庫全書薈要卷一萬五千五百八十六

集部

誠齋集卷九

宋 楊萬里 撰

詩

荆溪集

上已

上已春陰政未開  
寒牕愁坐冷如灰  
凍蠅觸紙飛還落  
仰面翻身起不來

雨冷風酸數日強老懷不可更禁當春寒幸自將歸去  
喚取重來是海棠

正是春光最盛時桃花枝映李花枝鞦韆日暮人歸盡  
只有春風弄彩旗

寒食雨作

雙燕衝簾報禁烟喚驚晝夢聳詩肩晚寒政與花為地  
曉雨能令水作天桃李海棠聊病眼清明寒食又來年  
老來不辨瑣新句報答風光且一篇

垂絲海棠半落

雨後精神退九分  
病香愁態不勝春  
落階一寸輕紅雪  
卷地風來故惱人

寒食相將諸子遊翟園得十詩

雨罷饒晴色  
松陰轉午時  
堆成李花雪  
開遍海棠枝  
旋酌新篘酒  
畱題細字詩  
不來真是枉  
欲去更云遲

鹿蔥舊種菊新栽  
幽徑深行忘却回  
忽有野香尋不得  
蘭於石背一花開

柳條老去尚青鮮  
下有清渠遶野田  
波面落花相趁走  
避風爭泊岸傍邊

儘忙也到翟園休  
只見春光不見愁  
屈折海棠團更密  
日光下照繡燈毬

小小茅亭短短窓  
海棠園裡柳中央  
乍晴萱草渾無力  
落盡梅花尚有香

兒曹健走儘從渠  
老脚微酸半要扶  
未委前頭花好否  
且令蜂蝶作前驅

三月風光一歲無  
杏花欲過李花初  
柳絲自為春風舞  
竹尾如何也學渠

驅使花枝苦未休  
平章詩句政冥搜  
無端一竇西窓日  
不遣吾人略小留

花木從渠取次栽  
青山那肯入城隈  
翟公不有驅山手  
城裡松林底處來

荆溪老守底風流  
哦就千詩一笑休  
天欲做春無去處  
只堆濃綠柳梢頭

三月十日

纔看桃李錦成圍，忽便園林綠作堆。  
遠草將人雙眼去，飛花引蝶過牆來。  
簿書節裡無多着，懷抱朝來得好開。  
已是七分春去了，何須鳥語苦相催。

清明雨寒八絕句

整冠忽見鏡中霜，挽樹渾無蒂上香。  
已貯春愁過萬斛，更令細細着升量。

脫却單衣着袂衣，禁烟無有不寒時。  
一年好處君知麼？



寒食千門挿柳枝

今年寒食與清明各自陰晴作麼生  
細雨千絲不成點如何也解滴簷聲

桃李一空春已歸不須更待絮飛時  
閉門獨琢春寒句只有輕風細雨知

苔堦滴雨翠方濃須把寒珠濺鹿葱  
梅子猶粘雪前蕊海棠生恨夜來風

莫嫌細雨苦飄蕭政要寒聲伴寂寥  
杏葉猶疎不成響

且將紙瓦當芭蕉

閉戶何緣得句來  
開窗更倩雨相催  
只言春色都歸去  
小樹桃花政晚開

風軟衆柳自成妍  
雨泣殘花不忍看  
急喚麴生嘗杏子  
及渠小苦未生酸

題山莊草蟲扇

風生蚱蜢怒鬚頭  
紈扇團圓壁月流  
三蝶商量探花去  
不知若箇是莊周

清明果酒飲二首

南溪春酒碧於江北地鵝梨白似霜顏却老人山作玉  
更加食邑醉為鄉春光如許天何負雨點殊踈燕不妨  
絕愛杞萌如紫蕨為烹茗椀洗詩腸

深着爐香淺着枯栢行儘緩莫教催可憐花樹渾無賴  
下却簾鉤也入來雪藕新將削冰水蔗霜只好點青梅  
明年寒食還家去却憶荆溪花正開

和張倅子儀送鞋紅魏紫崇寧紅醉西施四

種牡丹

朱墨勾添眼底塵今年春盡不知春  
鞋紅魏紫能相訪  
西子崇寧更可人

洛花移種到松江國色天香內樣裝  
老裏嬾邊無好思  
為渠覓句却窮忙

次李侔子壽郡集詩韻

蒼壁新煎第二泉博山深炷古龍涎  
草玄顧我非揚子  
能賦如公是仲宣詩社自甘編下戶  
醉鄉何苦不開邊

窮州地主慚司業不解時時與酒錢

薛舍人母方氏太恭人挽章二首

熊膽平生苦魚軒晚歲榮芝蘭今柱史苗裔古玄英寒  
食花爭泣元宵燭半明從今好時節萱砌罷君羹

恭人  
以上

元日生寒  
食日死

賦感東征句詩愁陟屺篇生前九齡夢眼底五朝天錦  
誥渾無恙雲車忽杳然不堪青竹笋歸路不迎船

恭人  
元祐

年中  
生

櫻桃

櫻桃一雨半彫零更與黃鸝翠羽爭會計小風畱紫脆  
殷勤落日弄紅明摘來珠顆光如濕走下金盤不待傾  
天上薦新舊分賜兒童猶解憶寅清

予舊在奉常孟夏  
太廟薦櫻桃禮官

各分賜四簋奉  
常有寅清堂

雨後行郡圃

雨餘行脚古城隈為愛危亭首屢回無數菊苗齊老去  
多時花徑不曾來

多稼亭前雨檻芍藥紅白對開二百朵

紅紅白白定誰先  
嫋嫋娉娉各自妍  
最是倚欄嬌分外  
却緣經雨意醒然  
晚春早夏渾無伴  
暖艷晴香政可憐  
好為花王作花相  
不應只遣侍甘泉

論花者以牡丹  
王芍藥近侍

小雨

雨纔放脚又還無  
葉上蕭蕭半霎餘  
貯得千珠無點漏  
絲窠元自不勝疎

六月喜雨

守臣兩月禱山川詔旨纔頒便沛然不是格天緣詔旨  
憂民天子本如天

玄雲直下素光開雨到前山只恐回霹靂一聲風一陣  
為儂催上半天來

今年不是雨來慳不後秧時亦不前自古浙西長苦澇  
近來無澇恰三年

和李子壽通判曾慶祖判院投贈喜雨口號  
雷起嘉山半點蒼  
乘龍無地著身藏  
向嫌白雨來差晚



但遣黃雲作大穰

塵漲街頭不識泥朝來也解滑霜蹄兩公玉句驚風雨  
把玩都忘日脚西

雨早些時打麥殘雨遲許日即秧乾阿誰會得天公意  
只道今年乞雨難

夢中簷溜作灘聲幼竹新荷總解鳴曉色滿城渾是喜  
更無一寸旱時情

蘇湖元以水為鄉春旱偏欺潤與常一雨忽來三晝夜

兩公卷八八詩章

守臣閔雨幾曾欣  
兩月天高叫不聞  
黃紙帶將金雨至  
分明端為聖明君

謫仙下筆不曾休  
句似銀盤柘彈流  
我欲將渠卜鄰著  
對披蓑笠刺漁舟

南豐每見每津津  
繭紙松煤幻好春  
幸與李侯成二妙  
更添楊子作三人

曉登多稼亭

過雨梅無半箇黃  
冬青枝上雪花香  
不須更要風吹面  
看著青林意自涼

雨前田畝不勝荒  
雨後農家特地忙  
一眼平疇三十里  
際天白水立青秧

尚無池水泛荷香  
幸有園英照竹窓  
雪白葵花持玉節  
柿紅萱草立金幢

六月六日小集

青李來禽已眼明  
新瓜入夏見何曾  
酒邊忘却人間暑

消盡金盆一尺水

新蟬聲澀亦無多  
強與嬌鶯和好歌  
盡日舞風渾不倦  
無人奈得柳條何

雨足曉立郡圃荷橋

郡池六月水方生  
便有新荷貼水輕  
雨後獨來無箇事  
閒聽啼鳥話昇平

登多稼亭曉望

風不能銷曉霧痕  
天猶未放宿雲根  
城腰折處纔三徑

山背前頭別一村

午熱登多稼亭

矮屋炎天不可居高亭爽氣亦元無小風不被蟬餐却  
合有些涼到老夫

芒鞋葵扇頗蕭然倦倚胡牀不是眠避處無藏身去處  
追涼行盡竹旁邊

不是城中是甌中雨餘日色更明紅若為飛上金山頂  
獨立長江萬里風

柳外花邊忽颯然好風一點破愁顏  
岸中獨倚千尋樹閒看南雲度北山

御風不必問雌雄只有炎風最不中  
却是竹君殊解事炎風節過作清風

張尉惠詩和韻謝之

下筆生波便百川字間句裏總超然  
讀來清氣涼人骨六月真成九月天

軟紅塵裏眼曾開苦被新詩猛喚回  
借問錦心能底巧

更從月脇摘將來

老去才情半拘慳不愁不退豈愁前清風明月無拘管  
與子分張更一年

卧治齋晚坐

閉戶坐不得開窓竚微涼樹林蔭白日几研生碧光信  
手取詩卷細哦三數章初披頗欣愜再覽忽感傷廢卷  
不能讀起行繞胡牀古人恨如山吾心澹於江本不與  
彼謀云何斷我腸感罷翻自笑一蟬催夕陽

懋懷古堂

新葺懷古堂舊臨郭璞池去歲夏徂秋無日不此嬉  
茨菰無暑性芙蓉有涼姿今年池水乾老子來遂稀豈  
惟來不畱亦復去靡思朝來偶一到又覺景特奇水含  
霽後光荷於風處欹便有白鷗下驚起翠羽飛方池  
濫窓東長池橫簷西紅綠向背看觴詠朝夕宜此堂  
初無情此池諒何知如何涉斯世乖逢亦有時

望雨



雲興惠山頂雨放太湖脚初愁望中遠忽在頭上落白  
羽障烏巾衣袖已沾渥歸來看簷溜如瀉萬仞壑霆裂  
大瑤甕電縈濕銀索須臾水平堦花塢濕半角定知秧  
疇滿想知田父樂向來春夏交旱氣亦太虐山川已遍  
走雲物竟索寞雙鬢愁得白兩膝拜將剝早知今有雨  
老懷枉作惡

聞一二故人相繼而逝感歎書懷

故人昔同朝與遊每甚歡豈緣勢利合相得文字間有

頃各補外不見今六年我來荆溪上敲榜索租錢故人  
復雙入飛上青雲端我雖世味澹羨心能憇然忽傳故  
人去得書墨未乾又傳故人亡驚悼摧肺肝鼎貴良獨  
佳安貧未遽賢向以我易彼安知不作難今以彼易我  
試問誰當慳如何捐此軀必要博好官顧謂妻與子官  
滿當歸田我賤汝勿羞我貧汝勿嘆從汝丐我身百年  
庶團圞妻子笑荅我修短未易言富貴必速殞郭令當  
天殘貧賤果永筭顏子壽必延我復荅渠道薄命我自

憐我福肯如郭我德敢望顏造物本嗇與我乃多取旃  
借令彼不怒退省我獨安汝言自有理我意不可還

晚步追涼

老眼偏明遠岫孤夕陽故遣樹陰踈蟬鳴葉底無尋處  
隨意閒行偶見渠

風不須多只是涼穿花度柳到人傍細吹病耳颼颼響  
徐弄輕衫拂拂長

荷橋暮坐

橋剪荷花兩段開  
荷花畱我不容回  
不勝好處荷橋坐  
政是涼時蚊子來

池似平鋪柳錦橫  
荷花為緯藻為經  
無端織出詩人像  
獨立飛橋摘斗星

水到荷花蒂風生  
菰葉梢鷗鳬晚聲散  
天水夕光交

休日晴曉讀書多稼亭

攜家守荆溪忽忽已一期  
官舍非不佳懷抱長鮮怡  
若非僮僕病定復女兒啼  
昔貧歎不飽今愁豈緣飢  
晨起

袖書冊急登亭上嬉露痕尚星月風氣無窓扉頓覺老  
病身不禁絺綌衣昨暑何可度朝涼乃爾奇白鳥遠如  
蝶玄蟬哦似詩松色雪我神荷香水我脾憂樂忽安在  
形骸亦俱遺穉子不解事朝餐呼我歸

多稼亭上望三山中峯獨秀而低

三山道是遠連天亭上看來只近簷可惜當初低少許  
三山幸有一峯尖

雨後晚步郡圃

畫舫鳴鉦野寺鐘暮聲驚破翠烟重好風不解藏天巧  
雕碎孤雲作數峯

風勒歸雲帶雨回不容老子小徘徊撥忙也到池亭上  
昨日卷荷今盡開

曉坐荷橋四首

雨後晨前絕爽時胡牀四面是荷池荷珠細走惟愁落  
為報薰風莫急吹

四葉青蘋點綠池千重翠蓋護紅衣蜻蜓空裏元無見

只見波間仰面飛

碧玉山邊白鳥鳴  
綠楊風裏翠荷聲  
草花踏碎教人惜  
為勒芒鞋款款行

簾影窺池到藕根  
水光為我弄朝暉  
魚兒解作晴天雨  
波面吹成落點痕

池亭

小沼纔階下孤亭  
恰水邊揩磨一玉鏡  
上下兩青天可  
惜無多水誰堪著  
釣船今年非不暑  
每到每醒然

卧治齋盆池

舊來菰葉已全衰，旋買新荷帶藕栽。  
看得荷花作蓮子，可憐時節被花催。

凝露堂前紫薇花，兩株每自五月盛開九月  
乃衰。

晴霞豔豔覆簷牙，絳雪霏霏點砌莎。  
莫管身非香紫吏，也移牀對紫薇花。

似癡如醉弱還佳，露壓風欺分外斜。  
誰道花無紅百日，



紫薇長放半年花

暮坐中庭

蚊子因涼減蟬聲入暮多有愁無處著不飲欲如何

食蓮子

蜂不禁人採蜜忙荷花蕊裏作蜂房不如玉蛹甜如蜜  
又被詩人嚼作霜

食雞頭

龍宮失曉惱江妃也養鳴雞報早暉要啄稻梁無半粒

只教滿額飽珠璣

暮雨既霽將兒輩登多稼亭

一霎滂沱一霎晴  
簷間點滴尚殘聲  
水將樹影亂揉碎  
月與日光相對明  
試數六宵還五雨  
坐令夏熱作秋清  
兒曹小住休歸去  
更聽風蟬子細鳴

苦熱登多稼亭二首

日脚斜紅欲暮天  
倚欄垂手弄雲烟  
兩行相對樹如許  
一葉不搖風寂然  
剩欲啜茶還罷去  
却愁通夕不成眠

黑絲半把垂天外白雨初生遠嶺邊

吏散庭空便悄然不須休日始偷閒  
鷗邊野水水邊屋城外平林林外山  
偶見行人回首却亦看老子立亭間  
暮蟬何苦催歸急只待涼生月半環

暮熱遊荷池上

玉礫金沙一徑長暑中無處可追涼  
獨行行到荷池上荷不生風水不香

寒甃千尋汲井花病身一浴不勝佳  
追涼不得渾閒事

燒眼生憎半幅霞

細草搖頭忽報儂披襟攔得一西風荷花入暮猶愁熱  
低面深藏碧傘中

也不多時便立秋寄聲殘暑速拘收瘦蟬有得許多氣  
吟落斜陽未肯休

空中斗起朶雲頭旋旋開來旋旋收初作鬢鬆松樹子  
忽成彷彿柳花毬

月下果飲七首

恰則天方暮如何月正中一年無此熱今夕絕無風早  
藕凝鬆雪新菱剥釀紅醉鄉堪避暑只合著衰翁

酒邊無物件長瓶一顆新蓮一段冰月下不風終是爽  
燭光何罪也堪憎

一年過暑一番愁六月梢時七月頭今夕追涼還得熱  
何時遇夏却逢秋

月初生處薄雲生到得雲銷月政明兩處打更如一處  
二更還作四更聲

坐久輕雲次第開  
月光飛入酒杯來  
今宵只有半邊月  
一半桂枝何處裁

斜斜花影欲愁予  
唧唧蟲聲亦愛渠  
月與詩人元不薄  
儂於歡伯未應疎

人靜更深丈室虛  
欲眠聊復小踟躕  
竹牀最冷也成熟  
羽扇不涼差勝無

誠齋集卷九

欽定四庫全書薈要卷一萬五千五百八十七

集部

誠齋集卷十

宋 楊萬里 撰

詩

荆溪集

曉坐多稼亭

日光烘碎一天雲散作濛濛霧滿村我亦知渠別無事  
不教遠岫翠當門

梳頭有感

身在荷香水影中  
曉涼不與夜來同  
且拋書冊梳蓬鬢  
移轉胡牀受小風

同郡同年總八人  
七人零落一人存  
如何獨立薰風裏  
猶怨霜花點鬢根

晚涼散策

飯餘浴罷趁涼行  
偶憩池頭最小亭  
醉倚胡牀便成睡  
夢聞荷氣忽然醒



半點輕風泛柳絲，忽吹荷葉一時欹。  
芙渠好處無人會，最是將開半落時。

閏六月立秋後暮熱追涼郡圃

上得城來眼頓明，暮山爭獻數尖青。  
垂楊舞罷西風葉，一葉多時獨未停。

夏欲盡頭秋欲初，小涼未苦爽肌膚。  
夕陽幸自西山外，一抹斜紅不肯無。

靜坐池亭

胡牀倦坐起凭欄人正忙時我正閒却是閒中有忙處  
看書纔了又看山

荷邊弄水一身香行裏招風滿扇涼道是秋來還日短  
秋來閒裏日偏長

秋暑

不教老子略眉開夏熱未除秋熱來一夜涼風吹欲盡  
半輪曉日喚將回

汗如雨點湧人膚一一鬢根一一珠不道去年秋不熱

今年秋熟去年無

半柳斜陽半柳陰  
一蟬飛去一蟬吟  
岸中亭子鈎欄角  
送眼江村松樹林

戲題

蜂居筆管没人知  
誰遣啾啾不住時  
最是蝸牛太多事  
長將宅子自相隨

曉登水亭

露氣仍荷氣  
秋風更曉風  
身兼水亭子  
雙墮玉壺中

讀元白長慶二集詩

讀遍元詩與白詩一生少傳重微之再三不曉渠何意  
半是交情半是私

白蓮

花頭素片剪成冰葉背青瓊刻作稜珍重兒童輕手折  
綠針刺手却渠憎

瓶中紅白二蓮

紅白蓮花共玉瓶紅蓮韻絕白蓮清空齋不是無秋暑

暑被花銷斷不生

揀得新開便折將忽然到晚斂花房只愁花斂香還減  
來早重開別是香

晚花特地斂新裝莫道無情總不妨中有黃金蓮子盞  
被人瞥見即深藏

白蓮半盞未開時看作紅蓮更不疑到得欲開渾別了  
玉膚洗退淡胭脂

折得荷花伴我幽更寒荷葉伴花愁孤房欲落偏多思

金方口口卷十  
一片先垂半不收

早起

不分老鈴下苦來驚我眠  
要知甘寢處最是欲明天  
未了公家事難銷月俸錢  
坐曹臨訟罷殘燭正熒然

曉登懷古堂

度暑過於歲初涼別是天  
獨穿秋露草來看曉風蓮  
病骨殊輕甚幽襟一灑然  
不妨聊吏隱何必更林泉

荷橋

橋壓荷梢過花園橋外饒荆溪無勝處勝處是荷橋

感秋

今歲五十二豈為年少人荷涼欣暑退蟬苦怨秋新淡  
慮翻成感雕詩不著塵小兒知得句頻掉小烏巾

南國初涼日東吳欲盡頭露荷幽馥曉雲日淡光秋也  
愛西風爽其如半老休蟬聲與蛩響計會兩催愁

雨後清曉梳頭讀書懷古堂

宿雨猶涼在晨陰欲霽初移牀近秋水正面對芙蓉團

扇淒無彩生衣凜覺疎欲歸仍小住更讀數行書

蟲響餘宵寂荷粧趁曉鮮梳頭花霧裏照水柳風前舊  
雨仍今雨新年勝故年登城有佳眺秋稼正連天

午坐卧治齋

雨後朝陰到午晴空齋孤坐納秋清一蟬也解憐幽寂  
柳外飛來葉底鳴

謝丁端叔直閣惠永嘉縣研句容香鬲

元珍先生茁雲孫雪竹有節豹有文染雲作句本天巧



縷水生花無手痕鵲鷺行邊舊聯翼天祿閣中今獨直  
半竿淮水將渠歸一笑荆溪豈人力贈我阿泓非姓陶  
木家居士漆園曹急呼陳玄導黑水花暈千層吹海濤  
句容銅山擣金屑幻出羽淵三足鰲兩耳踰肩一腹皤  
解吐黃雲香刮骨雙珍捉贈感故人禿翁有筆無全神  
杯水博詩元不直醬瓿覆却那作嗔阿泓處分珠絲裏  
延置銅君居上坐煮茶剥芡對爐薰遮莫白駒隙中過

檜徑曉步

老檜陰陰夾古城露叢迎貫日華明曉涼無箇人分却  
一徑深長獨自行

雨歇林間涼自生風穿窅裏曉逾清意行偶到無人處  
驚起山禽我亦驚

謝尤延之提舉郎中自山間惠訪長句

淮南使者郎官星瑞光夜燭荆溪清平生龐公不入城  
今我折却屐齒迎交遊雲散別如雨同舍諸郎半為土  
一老還將兩鬢霜三更重對孤燈語向來南宮綾錦堆

南窓北窓桃李開先生誦詩舌起雷一字不似人間來  
剡藤染出梅花賦句似梅花花似句幾年金鑰秘銀鈎  
玉筴不施恐飛去秋風呼酒荷邊亭主人自醉客自醒  
儂能痛飲渠不飲飲與不飲俱忘形鬢今如霜心如水  
功名一念扶不起儂歸螺山渠惠山來歲相思二千里  
小集食藕極嫩

比雪猶鬆脆無絲可得飄輕拈愁欲碎未嚼已先銷

秋懷

隨分哦詩足散愁老懷何用更冥搜  
聿來胥宇蟻移穴無以為家燕入秋  
蓋世功名吹劍首平生憂患漸矛頭  
從今歸去便歸去未到無顏見白鷗

七月既望晚觀菱壕

官壕水落兩三痕正是秋初雨後天  
菱荇中間開一路曉來誰過採蓮船

新涼感興

初退生衣進熟衣新涼只與睡相宜  
草爭人跡微疎處

荷怯秋風欲動時  
又是一年將過眼  
如何兩鬢不成絲  
中元節後新來嬾  
草冊纔抄第二詩

七月二十五日晚登多稼亭

風將烟雨入亭寒  
城引山林拓眼寬  
六月登臨渾覺熱  
朝來不敢傍危欄

凝露堂木犀

雪花四出剪鵝黃  
金屑千麤糝露囊  
看去看來能幾大  
如何著得許多香

金方口人卷十  
夢騎白鳳上青空徑度銀河入月宮身在廣寒香世界  
覺來簾外木犀風

中秋前一夕攜酒與子仁姪登多稼亭

月忽飛來墮我傍我還飛入月中央如何桂樹許多影  
不隔冰輪些子光自古中秋多苦事非風即雨斷人腸  
醉來不信寒欺酒露濕盃盤凍作霜

觀蟻

偶爾相逢細問途不知何事數遷居微軀所饒能多少

一獵歸來滿後車

一騎初來隻又雙  
全軍突出陣成行  
策勲急報千夫長  
渡水還爭一蒨杭

中秋無月至十七日曉晴

劣到中秋雲便興  
中秋過了却成晴  
霧橫平野村村白  
日上疎林葉葉明  
歲事不應如許早  
朝來已覺嫩寒生  
春吟不似秋吟好  
覓句新來分外清

重九前五日再游翟園

翟園不到纔幾日寒梢冷葉秋蕭瑟只有黃花數點明  
上照青松下蒼石記得春頭來此嬉梅花太瘦杏花肥  
巷南巷北皆春色恰似吾人年少時忽怪翟園許多老  
園應笑我衰容早來歲春光更一來我衰依舊園還少  
送子仁姪南歸

酒為吾人綠花知九日黃風燈秋焰冷霜雁夜聲忙愛  
子文無對嗟予老更狂相分即相見不待半年強

再歲來相款三盃忽語離忍將垂老淚滴作送行詩子



去儂猶住身留夢亦隨南溪舊風月千萬寄相思

食老菱有感

幸自江湖可避人懷珠韞玉冷無塵何須抵死露頭角  
荷葉荷花老此身

醉吟

古人亡古人在古人不在天應改不留三句五句詩安  
得千人萬人愛今人只笑古人癡古人笑君君不知朝  
來暮去能幾許葉落花開無盡時人生須要印如斗不

道金槌控渠口身前只解皺兩眉身後還能更盃酒李  
太白阮嗣宗當年誰不笑兩翁萬古賢愚俱白骨兩翁  
天地一清風

和丁端叔菊花

忽忽還重九匆匆又歲華不妨將白髮剩與插黃花

懷山莊子仁姪

危亭獨上忽徬徨欠箇山莊墮我傍却是向來相聚日  
老懷未解憶山莊

吾家小阮未西歸日日相從郡圃嬉黃菊拒霜今笑我  
先生也有獨來時

張子儀太社折送秋日海棠

新樣西風較劣些重陽還放海棠花春紅更把秋霜洗  
且道精神佳不佳

木葉離菊總無光秋色今年付海棠為底夜深花不睡  
翠紗袖上月和霜

晚登淨遠亭

重陽纔過便新寒去歲如今暑尚殘雲外雁來元不覺  
一聲喚我舉頭看

簿書纔了晚衙催且上高亭眼暫開野鴨成羣忽驚起  
定知城背有船來

黃菊

鶯樣衣裳錢樣裁冷霜涼露濺秋埃比他紅紫看差晚  
時節來時畢竟開

晚登子城

鞋響新霜後襟暄野日初寒溪半灣落遠樹一行踈老  
矣端何苦歸哉不願餘終更猶半歲作麼度居諸

多稼亭前黃菊

危亭俯涼圃落葉日夜深佳菊獨何為開花得我心韻  
孤自無伴香淨暗滿襟根器受正色非緣學黃金獨違  
春光早而俟秋寒侵豈不愛凋年坐令淹寸陰奈此清  
苦操愧入妍華林向來朱碧叢亦復悴斯今清霜慘萬  
象幽芳耿森森持以壽君子聊爾慰孤斟

促織

一聲能遣一人愁，終夕聲聲曉未休。  
不解縹絲替人織，強來出口促衣裘。

迂使客夜歸

去時岸樹日猶明，歸到州橋月已昇。  
水與天爭一輪玉，市聲人語兩街燈。  
迎來送往鬚成雪，索筆題詩硯欲冰。  
淨洗紅塵煩碧酒，倦來不覺睡騰騰。

病後霜威不見饒，吟邊月色苦相撩。  
重簾垂地寒猶入。

燼燭無風影自搖誰遣塵埃空老去何曾鷗鷺不吾招  
坐來已是愁無奈草露蟲聲政寂寥

起視青天分外青滿天一點更無星忽驚平地化成水  
乃是月華光滿庭筆下何知有前輩醉中未肯赦空瓶  
兒曹夜誦何書冊也遣先生細細聽

病身已怯九秋涼也復移樽下砌傍只愛盃中都是月  
不知身上幾多霜清愁舊覺天來遠寒夜新添歲樣長  
不是傍人俱欲睡老人無睡亦何妨

城頭秋望

秋光好處頻胡牀  
旋喚茶甌淺著湯  
隔樹漏天青破碎  
驚風度竹碧匆忙

未得霜晴未是晴  
霜晴無復點雲生  
鷺鷥不遣魚鷺散  
移脚惟愁水作聲

生酒歌

生酒清於雪煮酒  
赤如血煮酒不如  
生酒烈煮酒只帶  
烟花氣生酒不離  
泉石味石根泉眼  
新汲將麴米釀出



春風香坐上，緒紅間熊白。甕頭鴨綠變，鵝黃先生一醉。  
萬事已，那知身在塵埃裏。

夜雨

幽人睡正熟，不知江雨來。驚風颯然起，聲若山嶽摧。起  
坐不復寐，萬感集老懷。憶年十四五，讀書松下齋。寒夜  
耿難曉，孤吟悄無儕。蟲語一燈寂，鬼啼萬山哀。雨聲正  
如此，壯心滴不灰。即今踰知命，已先十年衰。不知後此  
者，壯心肯更回。舊學日荒蕪，書冊久塵埃。聖處與天似。

而我老相催坐念慨未已東窓晨光開

芭蕉雨

芭蕉得雨便欣然終夜作聲清更妍細聲巧學蠅觸紙  
大聲鏘若山落泉三點五點俱可聽萬籟不生秋夕靜  
芭蕉自喜人自愁不如西風收却雨即休

雨中懶困

城頭欲上苦新泥暖風薰人軟欲癡睡又不成行不是  
強來看打洛神碑

胡達孝水墨妙絕一世為余作枯松孫枝石  
間老栢謝以長句

東齋歸自浣花里訪我弄泉惠山趾隨身萬里只孤舟  
一簪不曾著行李忽拈遠物出袖中乃是孔明廟前古  
栢閬州松徑從平地便起立上穿屋瓦到青穹老蛟脫  
鱗乾見骨厥孫碧絲作鬚髮石間霜皮二千尺石似孤  
根根似石硬根瘦榦未要論葉間猶帶漢唐春歲久亦  
無苔蘚痕只有雪山之雪玉壘雲却收松栢半天裏凡

上捲來一張紙

苦吟

蟻無秋衣雁有裘  
霜天謀食各自愁  
雁聲寒死叫不歇  
蟻膝凍僵行復休  
先生苦吟日色晚  
老鈴來催喫朝飯  
小兒誦書呼不來  
案頭冷却黃蘗麪

晚倚野望

上却城來忘却歸  
迎他來雁送他飛  
可憐烏白能緇素  
却被清霜染作緋

毘陵郡齋追憶鄉味

坐無黃雀牛尾狸荆溪日日思江西若無鵝梨與海錯  
江西却恐思荆溪舊居江西不自惜到得荆溪却追憶  
明年官滿歸江西却憶荆溪再難得江珍海錯各自奇  
冬裘何曾羨夏絺鵝梨黃雀無不可荆溪江西不關我

和張漢直

宛水吹波解舫齋南徐弔古上高臺岸巾過我燈前語  
贈句清於月底梅對著酒船手持蟹管渠秋井骨生苔

壁間挂舌難能許一斗百篇真快哉

曉坐卧治齋

夜風甚細不勝酸霜落無聲只是寒日上東窓無箇事  
送將梅影索人看

行圃

飯罷來窺園晴路忽流水石子淨無塵一一濕如洗夜  
來元無雨霜消痕上爾稚子有素約杖屨從我戲老夫  
偶獨先穉子久不至初心一何樂中路慘不喜悵望行

復歌回顧亦三四行逢木葉開攀翻嗅霜藥

壕上

壕上朝來眼頓明小風淺水寫秋清新霜殺盡浮萍草  
放出靴紋水面生

白髮歎

素絲久即黑黑鬢久即絲絲黑有浣法鬢絲無染期日  
月有底忙晝夜馳向西江漢與之反却向東方馳江漢  
西流日東落鬢絲漆黑還如昨夜長何不秉燭遊自是

人生不行樂

紅葉

詩人滿腹著清愁吐作千詩未肯休  
寫遍壁間無去處却將紅葉強題秋

送蔡定夫提舉正字使廣東

國朝以來妙人物近世獨數乾道年  
皇帝乃武再開闢欲傾東海洗乾坤  
九淵探珠巖採璞天地為網罟羣賢  
玉堂金鉉貯稷契蓬山壁水俱崔班  
追還慶厯元祐初



突過貞觀開元前麟臺正字蔡夫子乃祖元是四諫官

風流文采已碧梧忠義慷慨仍青氍折檻舊痕故無恙  
后皇是日動龍顏嚴霜烈日照鵷鷺一身似葉飄淮堧  
柴門僵臥三臈雪魚釜僅續一線烟后皇九重念五嶺  
生愁雨露南方乾詔謂正字當居中肯為朕行綏百蠻  
梅花迎笑錦囊古南斗退避文星寒動搖山嶽細事耳  
約束海若收波瀾坐令百姓萬里外墮在二陝三輔間  
檳榔紅時芝泥紫歸來徑著侍臣冠我家江西更西處

白鷺洲對青原山公歸肯訪老翁否  
酤酒滿眼未必然  
青芻白飯聊隨緣

齋房戲題

長瓶舉我充自代短檠留人為莫逆  
醉鄉無日不瓜時  
書圓何朝無菜色欲從舉者便彈冠  
回顧石交難割席  
子墨客卿善運籌更問渠儂決去留  
墨卿轉問子虛子  
欲說還忘一笑休

太平寺水

郡人徐友畫  
清濟貫河

太平古寺劫灰餘夕陽惟照一塔孤得得來看還不樂  
竹徑荒處破殿虛偶逢老僧聽僧話道是壁間畱古畫  
徐生絕筆今百年祖師相傳妙天下壁如雪色一丈許  
徐生畫水纔盈堵橫看側看只麼是分明是畫不是水  
中有清濟一線波橫貫萬里濁浪之黃河雷奔電卷儘  
渠猛獨清元自不隨他波浪盡處忽掀怒攪動一河秋  
色暮分明是水不是畫老眼向來元自誤佛廬化作金  
施樓銀山雪堆風打頭是身飄然在中流奪得太一蓮

葉舟僧言此畫難再覓官歸江西却相憶并州剪刀剪  
不得鵝溪足絹官莫惜貌取秋濤懸坐側

水紋

池面尖風起烟痕一拂微無形還有影掠水去如飛  
初作眉頭皺還成簞面斑小風來不住織遍一池間

一鷺先立池中有雙鷺自外來先立者逐之  
雙鷺亟去莫敢敵者

鷺鷥各自有食邑長恐諸侯客子來一鷺忽追雙鷺去

窮追盡處始飛回

晚風寒林

已是霜林葉爛紅  
那禁動地晚來風  
寒鴉可是矜渠點  
踏折枯梢不墮風

樹無一葉萬梢枯  
活底秋江水墨圖  
幸自寒林俱淡筆  
却將濃墨點栖烏

霜夜無睡聞畫角孤雁

畫角聲從枕底鳴  
愁霜怨月不堪聽  
擁裯起坐何人伴

只有殘燈半暈青

梅邊玉瑄月邊橫吹落銀河與曉星  
城裏萬家都睡著孤鴻叫我起來聽

飲罷登淨遠亭

今歲寒應少冬深氣轉和  
都緣徑差曲添得步行多  
柳色猶青在霜威奈爾何  
忽然雙野鴨飛下一池波

晴望

愁於望處一時銷  
山亦霜前分外高  
枸杞一叢渾落盡

只殘紅乳似櫻桃

豫章王集大成惠我思古人實獲我心八詩

謝以五字

孤嗜難衆悅今聽非昔絃美人西山秀  
蕨茹飲澗泉雪簑韞明月冰棹刺野船  
寶祲耿不掩球聲忽復珊聞者已瞠若  
鬻之諒悠然良環彼何憎擊缶俗所便  
老我詎能聰妙音誤至前古人子所思  
而我豈古賢借不滿子賞能不聊子歎  
故家富彥士梧竹映芝蘭紫餘乃祖橐

朱遍羣從轡迅趾豈地行逸翎當雲騫昂哉搏羊角何  
必懷西山

不寐聽雨

雨到中宵寂不鳴只聞風拂樹梢輕瓦溝收拾殘零水  
併作簷間一滴聲

送張元直尉鹽官二首

壁水寒蘼客春聞擢桂郎折腰端小耐整翮未須忙德  
進官無小詩癯譽更香會看兩鷁鵲飛下蓼灘傍



溧水孟東野南昌梅子真平生一少府千載兩高人白  
馬松梢寺朱旗雪外春村行知得句寄我大江濱

和胡運幹題贈

詩似離騷與國風一襟塵土為君空來從月脇天心外  
墮在水甌雪碗中判却青燈窮活計早歸紫禁策元功  
麴生不怕愁城峻聊遣渠儂為九攻

夜雨獨覺

枕上還鄉枕上回更更點點把人催雨將苔砌滴到曉

風揀荻簾疎處來每到週年每多感不教睡眠不曾開  
來宵我識華胥路莫近茶甌近酒盃

夜聞風聲

作寒作暑無處避花落花開儘他意只有夜聲殊可憎  
偏攪愁人五更睡幸自無形那有聲無端樹子替渠鳴  
斫盡老槐與枯柳更看渠儂作麼生

詠壺

庾郎晚崧翡翠茸金城土酥玉雪容如何俱墮瑤甕中


却與醯雞同閼宮金井銀牀水清泚雪山冰谷鹽輕脆  
秋風一月釀得成字曰受辛非麴生太學儒生朝復暮  
茹冷啜寒那可度十年雪汁凍蔬腸一夜飢雷聽更鼓  
不如甕頭吏部甕頭醒一逢受辛還一醒畢卓與爾同  
死生

誠齋集卷十

謹案卷九第四頁前八行杏葉猶踈不成響原本  
葉訛藥據別本改

卷十第二頁前四行上得城來眼瑣明原本明訛  
開據別本改





總校官庶吉士臣張能照

校對官庶吉士臣陳文樞

謄錄監生臣周學澐

欽定四庫全書薈要

集部

誠齋集卷十二

詳校官助教臣謝登雋





欽定四庫全書蒼要卷一萬五千五百八十八

集部

誠齋集卷十一

宋 楊萬里 撰

詩

荆溪集

蟹醬

忽有瓶罌至捲將江海來  
玄霜凍龜殼紅霧染珠胎  
魚鮓兼蝦鮓奴才更婢才  
平章堪一飯斷送更三盃

池冰

池底枯荷瘦不勝池冰新琢玉壺凝如何畱到炎蒸日  
上有荷花下有冰

怕寒不敢上高臺上得高臺急急回日欲消冰風不允  
天猶未夕月先來

節日新晴歸自天慶

初日明雁腹酸風迎馬頭如何一雨過添却滿城秋樓  
觀色俱喜槐榆影獨愁節中公事少吏散得吾休

城上野步用轆轤體

初勁無遺暖晴行失老懷葉飛楓骨立萍盡沼奩開路  
好仍回首泥殘敢放鞋登臨不須盡畱眼要重來

晴眺

野意隨宜有山光如望無寒曦不自暖落木幾曾枯不  
分霜前樹長啼月下烏苦吟徐便悔可惜數莖鬚

霜曉

霜重曉未覺日高融始寒空牆半根濕落葉片聲乾

晚興

老來懷抱向誰開  
歲晚無花薦一盃  
處分新霜且留菊  
辟差寒日早開梅  
只教詩句清如雪  
看得榮名細似埃  
管葛諸人端解事  
也曾遭我笑渠來

暮寒

過雁雙仍急  
寒鴉隻已多  
絕憐晴色好  
無奈暮寒何  
眼病書休讀  
心勞句尚哦  
老生窮事業  
此外豈無他

酒蛤蜊

飲者憐渠有典刑見渠借箸眼偏青平生閉口不論事  
晚歲搜腸求獨醒

蒲桃乾

涼州博酒不勝痴銀漢乘槎領得歸玉骨瘦來無一把  
向來馬乳大輕肥

梨

掛冠大谷肯干時釘坐風流特地奇骨裏馨香衣不隔  
胸中冰雪齒偏知賣漿碎搗瓊為汁解甲方憐玉作肌

金方口月  
卷十一  
老子醉來渾謝客見渠倒屣只嫌遲

蠟燭

未夜身先卧不春花已開泣殘雙淚雨愁得寸心灰

小立淨遠亭

清景無終極頻來未屬厭遠山秋後出郊屋近來添

新晴曉步

冬來莫莫雨絲絲竹徑梅坡跡頻稀作意新晴聊一出  
行逢濕路却成歸

探梅

春傍梅梢瘦處回  
小花未忍折將來  
却緣久住成幽事  
剩看南枝一度開

和王司法雨中惠詩二首

絕憐法曹三尺喙  
不辨太倉五升米  
胡奴走送今寂然  
公路如何令至此  
春花秋月千首詩  
一字不曾堪療飢  
黃獨已空鑊底用  
玉徽凍脫琴為炊  
窮鬼偏隨天下士  
再結柳車君但試  
不應滿腹貯六奇  
豈有逐貧無一計

詩中哀怨海樣深青燈搔首夜沉沉一尊往慰風雨晚  
莫管帶圍寬一眼

無那詩愁著莫人風顛雨急更昏昏登臨無地可散策  
剝啄阿誰來叩門安得與渠呼玉酒醉餘同看落金盆  
齋厨索寞如懸壺慙媿酸寒遣一尊

惠泉酒熟

敲水汲山泉炊玉釀霜醅忽然油成泓失却瓊作堆抱  
甕輸竹渠挈甌注銀盃銀盃不解飲傾瀉入我懷酒聖



凡五傳道統到吾儕誰云孟氏醇軻死不傳來醉鄉天  
張幕糟丘麴為臺吾欲往相宅今夕未擬回

晝倦

愛日曛人欲睡昏自勻嫩火炷爐薰蜘蛛已去惟存網  
猶罨牕間一隻蚊

戲題水墨山水屏

櫂郎大似半邊蠅摘蕙為船折草撐今夜不知何處泊  
浪頭正與嶺頭平

以糟蟹洞庭甘送丁端叔端叔有詩因和其  
韻

斗州只解寄鵝毛鼎內何曾饋百牢驅使木奴供露顆  
催科郭索獻霜螯鄉封萬戶只名醉天作一丘都是糟  
却被新詩大清絕喚將雪霰更風餐

曉坐

拂曉文書已罷休却披詩卷散閒愁只驚兩眼生光彩  
日到東窓半角頭

凍蠅

隅窓偶見負暄蠅  
雙脚接掌弄曉晴  
日影欲移先會得  
忽然飛落別窓聲

壕上書事

十里長壕展碧漪  
波痕只去不曾歸  
鷺鷥已飽渾無幹  
獨立朝陽理雪衣

霜

天欲吹霜不作難  
連宵也費許多寒  
新裝瓊甲為蔬甲

仍化朱欄作玉欄

冬至前三日

故山千里幾時回  
又是初陽動琯灰  
酒不逢人還易醉  
詩如得句偶然來

鴉

穉子相看只笑渠  
老夫亦復小胡盧  
一鴉飛立鈎欄角  
子細看來還有鬚

朝飯罷登淨遠亭

近水孤亭迥紫城一徑斜霜林烏鵲國水岸鷺鷥家殊  
覺冬曦暖還拈小扇遮傳呼惠山水來瀾建溪茶

近節

節裏非無事忙中自有閒因風煩白鳥折簡喚青山詩  
卷一兩冊齋房三四間興來長得句却道在塵寰

冬至日歸自天慶觀

逗曉清寒未苦嚴輕霜隨分點茅簷霧中失却溪邊寺  
不見浮圖只見尖

節裏人家笑語饒日高猶是燭花交霜林遮眼八九葉  
露竹出牆三四梢

蠟梅

栗玉圓彫蕾金鐘細著行來從真蠟國自號小黃香夕  
吹撩寒馥晨曦透暖光南枝本同姓喚我作他楊

蜜蜂底物是生涯花作餓糧蠟作家歲晚略無花可採  
却將香蠟吐成花

眉間蜜酒發輕黃對著詩人不惜香金作仙衣元自冷

月中仍帶一身霜

蒼頭元不是花房  
融蠟熬酥戲滴將  
忽見微舒金爪甲  
不知中有紫香囊

江梅珍重雪衣裳  
薄相紅梅學杏粧  
渠獨小參黃面老  
額間豔豔發金光

霜寒輓轡體

滴地酒成凍喧天鴉訴寒  
窓風經怒響簾日漏溫痕偶  
爾尋梅去其如駐屐難  
沙鷗脚不韞故故踏冰翻

今曉難離火平生不擁爐只緣青女降便與管城踈淡  
日明還暗微暄有似無誰能忍寒得苦死去看書

苦寒

畏暑長思雪繞身苦寒却願柳回春晚來斜日無多暖  
映著西窓亦可人

添盡紅爐著盡衣一盃方覺暖如痴人言霜後寒無奈  
春在甕中渠不知

冰和菜把菜和冰心喜冬蘊齒却憎且忍牙車寒一點



教他胸次雪千層

晚晴獨酌

冷落盃盤下箸稀  
今年淮白較來遲  
異鄉黃雀真無價  
稍暖瓊酥不得時

霜熟寒輕際晚時  
簾間過影一鴉歸  
夕陽端與誰為地  
只照游塵絮樣飛

城頭曉步

古城秋後不勝荒  
人跡新行一徑長  
竹影已搖將午日

草根猶有夜來霜

城東行遍却城西欲問梅花乞一枝雪糝久團霜後朶  
嗔人頻看故開遲

送丁牧仲新除奉常寺簿入朝

帝念潛龍雪邸臣寵光玉樹照青春家藏履舄星辰舊  
天借旂常日月新從此雲霄君穩步向來鵷鷺我曾隣  
曲臺簿正多廊廟西府璇樞是一人

今樞密錢公  
嘗為奉常簿

贈節推學士

奏篇驚倒漢廷臣一眼元無四海人天下無雙聊小却  
洛陽年小是前身雲鵬飛上偏嫌早霧豹深藏更幾春  
寬作十年相見著剌將風雪試松筠

懷古堂前小梅漸開

梅邊春意未全回淡日微風暗裏催近水數株殊小在  
一梢雙朶忽齊開生愁落去輕輕折不怕清寒得得來  
腸斷故園千樹雪大江西處亂雲堆

隨意行穿翠篠林暗香撩我獨關心遙看小朶不勝好

走近寒梢無處尋  
未吐誰知膚底雪  
半開猶護蕊頭金  
老來懶去渾無緒  
奈此南枝索苦吟

絕豔原非著粉團  
真香亦不在鬚端  
何曾天上冰玉質  
却怕人間霜雪寒  
枝似去年仍轉瘦  
花於來歲定誰看  
老夫官滿梅應熟  
齒軟猶禁半點酸

揀得疎花折得回  
銀瓶水水養教開  
忽然燈下數枝影  
喚作窻間一樹梅  
歲律又殘還見在  
我頭自白不須催  
相看姑置人間事  
嚼玉餐香噉一盃

雪中登淨遠亭

犯雪來登淨遠亭  
飛花著水旋成冰  
瓊田萬頃珠千樹  
真在瑤臺十二層

數片初飛點砌苔  
須臾不覺玉千堆  
去年無雪非無雪  
畱作今年一并來

壕水深清一鏡如  
天傾瑤屑打成酥  
瑠璃缸面熬瓊粥  
釀出珠宮白玉腴

忍却清寒得得來  
不堪騎吏苦相催  
雁穿銀色界中去

人到水晶宮裏回

和趙鼎輔府判投贈賀雪之句

登城放目雪光中萬水千山一色同  
逗曉月華猶在地  
未春柳絮已隨風  
忽傳別駕贈佳句  
道是頻年當屢豐  
撚斷水鬚愁寡和  
玉花飛繞正濛濛

觀雪

銀屋瑤階頃刻成  
緩飄急灑總無聲  
屑雲作粉如何濕  
雕玉為花乃爾輕  
空裏仰看原不見  
日光未透不妨晴

滿庭更遣遲銷著，剩借書窓幾夜明。

坐看深來尺許強，偏於薄暮發寒光。  
半空舞倦居然嬾，一點風來特地忙。  
落盡瑤花天不惜，封他梅蕊玉無香。  
倩誰細撚成湯餅，換却人間烟火腸。

和吳寺丞喜雪

珠唾銀鈎贈一通，炯如密雪墮寒空。  
飛來數片不霑袖，剪出六花全是風。  
骨冷魂清殘醉裏，日光玉潔晚晴中。  
先生秀句今無敵，誰送相如奏舜瞳。

雪晴

銀色三千界瑤林一萬重新晴天嫩綠落照雪輕紅兒  
劣敲冰柱身清墮蕊宮何須師鮑謝詩在玉虛中

晴後雪凍

負暄尚覺日無功炙手仍愁火失紅本是雪前風作雪  
却緣雪後雪生風四郊凍合如相約七日晴來不肯融  
舊說醉鄉堪避暑避寒也合此鄉中

和丁端叔喜雪



天將一雪淨乾坤便恐湯泉亦不溫  
瑤草忽生無種子梅花寒損要溫存  
清游未到先回棹高卧何如且閉門  
珍重故人貽妙語追還正始最初元

雪凍未解散策郡圃

積雪偏工霽後凝不妨冷極不妨清  
靜聞簷滴元無雨倒掛冰牙未怕晴  
獨往獨來銀粟地一行一步玉沙聲  
圃中散策饒君強敢犯霜風上古城

雪後十日日暖雪猶未融

地凍雪起立簷生冰倒垂日穿銀筍透風琢玉山欹今  
曉還差暖清寒退尚遲生愁便銷去將底伴銀鬕

殘雪

殘雪堆成山數重懸崖幽竇玉玲瓏如何借得仙人掌  
擎取瓊瑤三四峯

多稼亭日色甚暖忽有雪數片自晴空而下  
已而復無

霽日何曾惹寸雲忽飛些子雪如塵不知底處天花落

風裏吹來數點春

兒啼索飯

飽暖君恩豈不知  
小兒窮慣只長飢  
朝朝聽得兒啼處  
正是炊梁欲熟時

寒雀

百千寒雀下空庭  
小集梅梢話晚晴  
特地作團喧殺我  
忽然驚散寂無聲

晚眺

晚暖好登臨吾衰也不禁雪殘千嶂玉日落萬梢金

雪夜候迎使客

六花不放一塵生晴後猶餘十日凝新月未光輸與雪  
夜風儘冷只留冰候迎銀漢槎頭客挑盡玉蟲窓下燈  
紙帳蒲團地爐暖自憐不及草庵僧

燭下梅花

燭下一枝梅欲開猶未開渾如玉冠子戴月上瓊臺  
窓外雪猶凍瓶中梅不開燭花將暖氣催得早春回

燭下瓶中江蠟二梅

江梅蠟梅同日折白晝看來兩清絕如何對立燭光中  
只見江梅白於雪

使客不至夜歸獨酌

使客夜不至還舍欣小歇盃盤只草草足可相煖熱庭  
前雪夜明道是簾外月及見盤中酥喚作庭前雪

謝趙行之惠霜柿

紅葉曾題字烏桕昔擅場凍乾千顆蜜尚帶一林霜核

有都無底吾衰喜細嘗慚無瓊玖句報惠不相當

謝葉叔羽總領惠雙淮白

寶奩寡貢笑權臣筠罽分甘荷故人天下衆鱗誰出右  
淮南雙玉忽嘗新未知丙穴果何似只恐子魚無此珍  
敢遣腹腴勸年少一盃端合壽吾親

情知此味飲中環暖律何緣到死灰去歲海紅猶間識  
今年淮白不曾來一寒尚有綈袍贈雙鯉仍隨尺素回  
厚祿故人書盡絕只餘計相解相哀

詠酥

似膩還成爽纔凝又欲飄  
玉來盤底碎雪到口邊銷

送客歸登淨遠亭

犯寒送客只勞神上到危亭  
眼頓新雪汁滴人清入髓  
莫將衫袖障頭巾

池水動處水生瀾未覺今朝  
抵死寒便恐雪消難再得  
不辭鞋濕數來看

和范至能叅政寄二絕句

生憎雁鶩只盈前忽覽新詩意豁然錦字展來看未足  
玉蟲挑盡不成眠

夢中相見慰相思玉立長身漆點髭不遣紫宸朝補袞  
却教雪屋夜哦詩

卧治齋夜坐

今年一雪遍江淮半月晴光凍不開孤坐郡齋人寂寂  
一枝紅燭兩瓶梅

十一月二十八日雪至十二月十一日日色



方暖積雪始融

日華今日始微暄次第梅花暖更妍只有樹陰偏得意  
占他殘雪不還天

穉子弄水

穉子金盆脫曉冰綵絲穿取當銀鈿敲成玉磬穿林響  
忽作玻璃碎地聲

寄題石湖先生范至能參政石湖精舍

萬頃平湖石琢成尚存越壘對吳城如何豪傑干戈地

却入先生杖屨聲古往今來真一夢湖光月色自雙清  
東風不解談興廢只有年年春草生

不關白眼視青雲四海如今幾若人渭水傅巖看後代  
東坡太白即前身整齊宇宙徐揮手點綴湖山別是春  
解遣雙魚傳七字遙知掉脫小烏巾

和丁端叔歲晚書懷

嗟余不能知止如邴曼容又不能畢昏如尚子平軟紅  
塵裏白雙鬢坐見歲律空崢嶸催科撫字兩何有伎倆

已窮慚九九拔薤一本水一杆多謝同朝金石友雪欺  
老病忽抵巇西山凍裂不留薇詩壇老將更黷武我已  
三北猶窮追老懷不中數怡悵急漉鵝黃翻甕盎苛留  
殘雪更些時為我裝嚴麗譙上

郡圃殘雪

半依籬脚半依城多傍梅邊少際亭最是晚晴斜照裏  
黃金日射萬銀星

南風融雪北風凝晚日城頭已可登莫道雪融便無跡

雪融成水水成冰

城外城中雪半開  
遠峯依舊玉崔巍  
池水綻處纔如線  
便有鴛鴦浮過來

月夜觀雪

仙人愛雪不嫌寒  
挈月來看夜不眠  
游遍瓊樓霜欲曉  
却將玉鏡掛青天

月光雪色兩清寒  
見月初疑是雪團  
看得雪光還似月  
元來雪月一般般

月色還將雪色同  
雪光却與月光通  
都將大地作雪窟  
仍榜碧天名雪宮

雪晴窓開展唐詩得一片桃花悵然賦之

偶開詩卷雪窓晨  
中有桃花片尚新  
却憶攜詩花底看  
回頭又是一年春

梅露堂燕詩客夜歸

藥玉船中酒似空  
水沉烟上雪都融  
梅堂客散人初靜  
椽燭燒殘一尺紅

城壕水泮

雪力平欺半月晴東風今日始開冰  
長壕徹底都銷盡只有樓陰玉一稜

櫻桃煎

含桃丹更園輕質觸必碎外看千粒珠  
中藏半泓水何人弄好手萬籟搗空脆  
印成花鈿薄染作冰澌紫此果非不多  
此味良獨美

誠齋集卷十一